

րաւ դէպի արեւմուտք՝ բիւզանդական նա-  
հանդները նոքա հաստատուելով Փոքր Ասիա-  
յի կեդրոնական շրջաններում եւ Կիլիկիայի  
բարձունքների վերայ, իրենց հետ բերին մշա-  
կոյթային գեղարուեստի որոշ եւ բարձր ա-  
ւանդներ: Հայրենիքի մէջ Հայերն ունէին  
զարգացման հասած ճարտարապետական եւ  
ձեռագրական բարձր արուեստ. հաստատուե-  
լով նոր երկրում, ենթակայ նոր պայմաննե-  
րի եւ շրջապատի յարաբերութեան, կարող  
էին նրանք փոփոխութեան ենթարկուել,  
բայց ոչ անհետանալ: Կազմակերպեալ եկե-  
ղեցին իւր հայրապետութեամբ այդ աւանդ-  
ների պահպանն էր, բնականաբար, առանց  
աչքերը փակելու նոր պայմանների եւ ազ-  
դակների վերայ: Այդ նոր պայմաններն էին  
Բիւզանդիայի հետ աւելի սերտ առնչութիւ-  
նը, Խաչակիրների արշաւանքները, մահմե-  
տական ազգերի հետ անմիջական շփումը,  
Հայ թագաւորութեան ծաղկման հետ վաճա-  
ռականական երթեւեկութիւնը դէպի արե-  
ւելք եւ դէպի արեւմուտք, որ անդալի կեր-  
պով իրենց դրոշմն են թողնում Հայ կեանքի,  
հետեւապէս եւ արուեստի վերայ:

Եթէ մենք ի նկատի ունենանք Հայ ձեռա-  
գրական արուեստը մինչեւ ԺԱ. դարի վեր-  
ջերը եւ մինչեւ իսկ ԺԲ. դարի կէսերը, կը  
տեսնենք, որ նորա բնոյթը տարբեր է, քան  
թէ այնուհետեւ երեւան եկող երեսոյթներն  
են կիլիկեան շրջանում: Մինչ այդ Հայ ար-  
ուեստի բնոյթը արեւելեան է, համեմատ իւր  
դրացիների՝ Առաջաւոր Ասիայի ազգերի եւ  
Պարսկաստանի հետ ունեցած փոխազդեցու-  
թեան:

Հայ արքունիքը բարեկամական եւ խնա-  
միական յարաբերութեան մէջ է բիւզան-  
դական կայսերական կամ Խաչակիր պետու-  
թեանց տների հետ: Նրանք նստում, կանդ-  
նում, հազնուում են այլ կերպ, քան հայրենի-  
քում եղած իշխաններն էին: Ներսէս Լամբրո-  
նացին եւս ակնարկում է այդ մասին առ Լե-  
ւոն գրած թղթի մէջ եւ այդ իրապէս տես-  
նում ենք նրանց մանրանկարների վերայ: Հե-  
թում Բ.—ի ճաշոցի մանրանկարների մէջ  
նկատելի են Ֆրանսականի հետ, ինչպէս  
fleur de lie—ին, չինական կտորներից առնը-  
ւած վիշապների կամ թռչունների պատկեր-  
ներ: Եւ յիշուի Դրազարկի դպրոցի հնագոյն  
ձեռագիրներից մէկը՝ Տիւրքիսի Աւետա-  
րանը, ուսումնասիրուած նշանաւոր արուես-  
տագէտ Strzygowski—ի կողմից, գրուած 1113  
թուին, բայց արտագրուած 893 թուի օրինա-

կից՝ «ի Թագաւորութեան Հայոց Սմբատայ  
որդոյ Աշոտոյ Բագրատունոյ...», նկարա-  
զարդուած է բոլորովին արեւելեան ոճով,  
միանգամայն մօտ իւր մանրանկարչական մո-  
տիւներով եւ յատկապէս զարդագրութեամբ  
ԺԱ.—ԺԳ. դարերի արեւելեան Հայաստանի  
ձեռագիրներին: Չենք կարող ասել, թէ զար-  
դարանքն էլ արտանկարուած է 893 թուի օ-  
րինակից, բայց բուն հայրենիքի աւանդնե-  
րով անկասկած: Մեզ յայտնի է Դրազարկի  
նոյն ժամանակի միջին երկաթագրով մի այլ  
աւետարան, որ առաջ սեպհականութիւն էր  
նախկին Բենիկ վարդապետի ընտանիքի,  
այժմ Մ. Աթուռի մատենադարանում, թէ եւ  
սակաւաթիւ զարդերով, դարձեալ բոլորո-  
վին արեւելեան է: Հռոմկլան համեմատաբար  
աւելի ուշ է հանդէս գալիս որպէս գրչութեան  
կեդրոն. հայրապետական աթոռը նախ Ծով-  
քումն էր, իսկ դորանից էլ առաջ Սեաւ լե-  
րան Ծուղրի անապատում կամ Կարմիր վան-  
քում կարճ ժամանակով: ԺԲ. դարի առա-  
ջին տասնամեակներում այնտեղ կրթութիւն  
ստացան Ստեփանոս վարդապետի ձեռքի  
տակ այնպիսի հոյակապ եւ հայ մատենա-  
գրութեան պատմութեան մէջ նշանաւոր հան-  
դիսացած անձնաւորութիւններ, որպիսիք են  
Գրիգոր Գ. Պահլաւունի, Ներսէս Ծնորհալի  
եւ նրանց ուսումնակից Իգնատիոս եւ Սարգիս  
վարդապետները, մէկը Ղուկասի եւ միւսը  
Կաթողիկեայց թղթերի մեկնիչ: Կաթողի-  
կոսական աթոռը Հռոմկլայում հաստատուե-  
ցաւ միայն 1150 թուականին, բայց բնակա-  
նաբար իւր հետ բերելով արեւելեան աւան-  
դութիւնները:

\* \* \*

Մեզ յայտնի հնագոյն ձեռագիրը Հռոմկ-  
լայի, Գրիգոր Պահլաւունու հայրապետու-  
թեան ժամանակ՝ 1165/6 թուին մի մազա-  
ղաթեայ, երկաթագիր աւետարան է, Առա-  
քել արքեպիսկոպոսի ստացմամբ, որի պատ-  
կերն էլ նկարուած է աւետարանից առաջ:  
Յիսուս նստած է բարձրաթիկունք աթոռի  
վերայ, աջով յունական օրհնութիւն է տա-  
լիս, ձախով բռնել է բաց աւետարան՝ «Ես  
եմ լոյս աշխարհի» խօսքերով: Նորա առաջ  
կանգնած է «Տր. Առաքեալ ստացաւ սո-  
րա»: Պատկերը գեղարուեստական անուանել  
չենք կարող, թէ այստեղ եւ թէ աւետարա-  
նիչներինը: Աւելի յաջող են խորանազարդե-  
րը, զարդագրերն ու լուսանցքի զարդերը,  
որոնցից, տարաբաղդաբար, նմոյշ տալ չենք